

বিভাগীয় প্রতিবন্ধী প্রশিক্ষণ কেন্দ্র নিজেই প্রতিবন্ধী

সমুদ্র হক ॥ শুরুতে বলা হয়েছিল বিভাগীয় প্রতিবন্ধী প্রশিক্ষণ কেন্দ্র হবে দেশের সবচেয়ে বড়, যেখানে প্রতিবন্ধীরা হাতে-কলমে কাজ শিখে স্বাবলম্বী হবে। কেন্দ্রটি নির্মাণ করা হলো বগুড়া জেলা শহর থেকে প্রায় ৩০ কিলোমিটার উত্তর-পশ্চিমে শিবগঞ্জ উপজেলার আলিয়ারহাটে। বিএনপি সরকারের শাসনামলে সরকারী কর্মকর্তা ও পরিকল্পনাবিদদের অনেকেই তখন বাদ সেধেছিলেন এত বড় প্রকল্পটি কম যোগাযোগ সুবিধার নিভৃত গ্রামে না করতে। তৎকালীন প্রধানমন্ত্রী খালেদা জিয়ার এ্যাসাইনমেন্ট অফিসার ডাঃ ফিরোজ মাহমুদ ইকবালের বাড়ি ওই গ্রামে হওয়ায় সেখানেই বাস্তবায়ন করতে হবে এই প্রকল্প। হলোও তাই। আলিয়ারহাটে দ্রুত গড়ে উঠলো উত্তরাঞ্চলের ১৬ জেলা তথা বিভাগীয় প্রতিবন্ধী প্রশিক্ষণ কেন্দ্রের চারতলা করে তিনটি আবাসিক ভবন। চারতলা একটি হোটেল। একটি অফিস ভবন। একটি ট্রেনিং সেন্টার। চতুর্থ শ্রেণীর কর্মচারীদের বাসভবন। একটি পাম্প হাউস। এতগুলো ভবনের নির্মাণ ব্যয় প্রথমে ধরা হয়েছিল ৭ কোটি টাকা। পরে তা দফায় দফায় বাড়িয়ে ৩০ কোটি টাকায় ঠেকানো হয়। এ অবকাঠামো স্থাপনার কাজগুলো করে বিএনপির পছন্দের খাস লোকজন। বাইরে থেকে দেখানো হয় কাজ করছে ঠিকাদার। সর্বশেষ অবস্থা হলো, বছর সাতেক আগে এ কেন্দ্রের কাজ শেষ হয়েছে। গণপূর্ত বিভাগ কেন্দ্রটি সমাজসেবা অধিদফতরের কাছে হস্তান্তর করেছে। তবে কার্যক্রম শুরু হয়নি। এক সূত্র জানায়, ওই কেন্দ্রটি দেখাশোনার জন্য একজন লোক নিয়োগ করা হয়েছে। সরকারীভাবে কর্মকর্তা পর্যায়ের একজনকে নিয়োগ দেয়া হয়েছে। তিনি এখনও যোগদান করেননি। এতবড় একটি কেন্দ্র চালাতে যে লোকবল এবং সরকারী অর্গানোগ্রাম দরকার তাও ঠিক করা হয়নি। আরেক সূত্র জানায় প্রতিবন্ধীদের প্রশিক্ষণ কেন্দ্রের জন্য উন্নত যোগাযোগ ব্যবস্থা সমৃদ্ধ আধুনিক প্রযুক্তির সম্ভাবহারের যে পরিবেশ থাকা দরকার তা এই নিভৃত গ্রামে নেই। সবচেয়ে বড় কথা প্রতিবন্ধীদের চলাচলের জন্য যে ব্যবস্থা গড়ে তোলা দরকার তা নেই। বলা যায়, সুদূরপ্রসারী ভাবনানা করে এ প্রকল্প বাস্তবায়িত হয়। বর্তমান সরকার বহু কোটি টাকা ব্যয়ে নির্মিত এ প্রকল্পটিকে টিকিয়ে রাখতে আধুনিকায়ন করার এক পরিকল্পনা হাতে নিয়েছে, এমনটি জানিয়েছে এক সূত্র।